

四庫全書

集部

欽定四庫全書

白香山詩集卷九

歙縣汪立名編

長慶集九

感傷古調詩
五十五首

西明寺牡丹花時憶元九

前年題名處今日看花來一作芸香吏三見牡丹開豈
獨花堪惜方知老暗催何況尋花伴東都去未回詎知
紅芳側春盡思悠哉

立名按李肇國史補京城貴遊尚牡丹三十餘年矣
每春幕車馬若狂以不耽玩為耻執金吾鋪官園外

寺觀種以求利一本有直數萬者元和末韓令始至長安居第有之命斲去曰吾豈效兒女子邪

傷楊弘貞

顏子昔短

一作知

命仲尼惜其賢楊生亦好學不幸復徒

然

一作今復然

誰識天地意獨與龜鶴

一作蛇

年

權攝昭應早秋書事寄元拾遺兼呈李司錄

夏閏秋候早七月風騷騷渭川煙景晚驪山宮殿高
丹殿子司諫赤縣我徒勞相去半日程不得同遊遨到官
來十日覽鏡生二毛可憐趨走吏塵土滿青袍郵傳擁

兩驛簿書堆六曹為問綱紀掾何必使鉛刀

新栽竹

佐邑意不適閉門秋草生何以娛野性種竹百餘莖見
此溪上色憶得山中情有時公事暇盡日遶欄行勿言
根未固勿言陰未成已覺庭宇內稍稍有餘清最愛近
窗卧秋風枝有聲

秋霖中過

一作過

尹縱之仙遊山居

慘慘八月暮連連三日霖邑居尚愁寂況乃在山林林

下有志士苦學惜光陰歲晚千萬慮併入方寸心巖鳥
共旅宿草蟲伴愁吟秋天床席冷雨夜燈火深憐君寂
寞意攜酒一相尋

寄江南兄弟

分散骨肉戀趨馳名利牽一奔塵埃馬一汎風波船忽
憶分手時憫默秋風前別來朝復夕積日成七年花落
城中池春深江上天登樓東南望鳥滅煙蒼然相去復
幾許道里近三千平地猶難見況乃隔山川

曲江早秋

二年作

秋波紅蓼水夕照青蕪岸獨信馬蹄行曲江池四畔早
涼晴後至殘暑暝來散方喜炎燠銷復嗟時節換我年
三十六冉冉昏復旦人壽七十稀七十新過半且當對
酒笑勿起臨風歎

寄題盤屋廳前雙松

兩松自仙遊山移植縣廳

憶昨為吏日折腰多苦辛歸家不自適無計慰心神手
栽兩樹松聊以當去聲嘉賓乘春日一甌生意漸欣欣清

韻度秋在綠茸隨日新始憐澗底色不憶城中春有時
晝掩闌雙影對一身盡日不寂寞意中如三人忽奉宣
室詔徵為文苑臣閑來一惆悵恰似別交親一作情早知
煙翠前攀翫不逡巡悔從白雲裏移爾落囂塵

翰林院中感秋懷王質夫

王居仙
遊山

何處感時節新蟬禁中間宮槐有秋意風夕花紛紛寄
跡鷓鴣行歸心鷗鶴羣唯有王居士知予憶白雲何日
仙遊寺潭前秋見君

禁中月

海上明月出禁中清

一作秋

夜長東南樓殿白稍稍上宮

牆淨落金塘水明浮玉砌霜不比人間見塵土污清光

贈賣松者

一束蒼蒼色知從澗底來
斲掘經幾日枝葉滿塵埃
不買非他意城中無地栽

初見白髮

白髮生一莖朝來明鏡裏
勿言一莖少滿頭從此始青

山方遠別黃綬初從仕未料容鬢間蹉跎忽如此

別元九後詠所懷

零落桐葉雨蕭條槿花風悠悠早秋意生此幽澗中況
與故人別中懷正無悰勿云不相送心到青門東相知
豈在多但問同不同同心一人去坐覺長安空

禁中秋宿

風翻朱

一作來

裏幕雨冷通中枕耿耿背斜燈秋牀一人

寢

早秋曲江感懷

離離暑雲散
嫋嫋涼風起
池上秋又來
荷花半成子
朱顏自銷歇
白日無窮已
人壽不如山
年光急於水
青蕪與紅蓼
歲歲秋相似
去歲此悲秋
今秋復來此

寄元九

身為近密拘
心為名檢縛
月夜與花時
少逢杯酒樂
唯有元夫子
閒來同一酌
把手或酣歌
展眉時笑謔
今春除御史
前月之東洛
別來未開顏
塵埃滿尊杓
蕙風晚

香盡槐雨餘花落秋意一蕭條離容兩寂寞況隨白日
老共負青山約誰識相念心鞦鷹與籠鶴

春暮寄元九

梨花結成實燕卵化為雛時物又若此道情復何如但
覺日月促不嗟年歲徂浮生都是夢老小亦何殊唯與
故人別江陵初謫居時時一相見此意未全除

早梳頭

夜沐早梳頭窗明秋鏡曉颯然握中髮一沐知一少年

事漸蹉跎世緣方繳繞不學空門法老病何由了未得
無生心白頭亦為天

出關路

山川函谷路塵土游子顏蕭條去國意秋風生故關

別舍弟後月夜

悄悄初別夜去住兩盤桓行子孤燈店居人明月軒平
生共貧苦未必日成歡及此暫為別懷抱已憂煩況是
庭葉盡復思山路寒如何為不念馬瘦衣裳單

新豐路逢故人

塵土長路晚風煙廢宮秋相逢立馬語盡日此橋頭知
君不得意鬱鬱來西遊惆悵新豐店何人識馬周

金鑾子晬日

晬將遂切子
生一歲曰晬

行年欲四十有女曰金鑾生來始周歲學坐未能言慙
非達者懷未免俗情憐從此累身外徒云慰目前若無
天折患則有婚嫁牽使我歸山計應遲十五年

立名按雲仙襟記樂天女金鑾十歲忽書北山移文
示家人樂天方買終南紫石欲開文士傳遂輟以勒

之

青龍寺早夏

塵埃經小雨地高倚長坡日西寺門外景氣含清和閒
有老僧立靜無凡客過殘驚意思盡新葉陰涼多春去
來幾日夏雲忽差栽朝朝感時節年鬢暗蹉跎胡為戀
朝市不去歸煙蘿青山寸步地自問心如何

秋題牡丹叢

晚叢白露夕衰葉涼風朝紅豔久已歇碧芳今亦銷幽

人坐相對心事共蕭條

勸酒寄元九

薤葉有朝露
檉枝無宿花
君今亦如此
促促生有涯
既不逐禪僧
林下學楞伽
又不隨道士
山中煉丹砂
百年夜分半
一歲春無多
何不飲美酒
胡然自悲嗟
俗號消愁藥
神速無以加
一杯驅世慮
兩杯反天和
三杯即酩酊
或笑任狂歌
陶陶復兀兀
吾孰知其他
況在名利途
平生有風波
深心藏陷穿
巧言織網羅
舉目非不見
不

醉欲如何

曲江感秋

五年作

沙草新雨地岸柳涼風枝三年感秋思併在曲江池早
蟬已嘹唳晚荷復離披前秋去秋思一一生此時昔人
三十二秋興已云悲我今欲四十秋懷亦可知歲月不
虛設此身隨日衰暗老不自覺直到鬢成絲

酬張太祝晚秋卧病見寄

高才淹禮寺短羽翔禁林西街居處遠北闕官曹深君

病不來訪我忙難往尋差池終日別寥落經年心露濕
綠蕪地月寒紅樹陰况茲獨愁夕間彼相思吟上歎言
一作言歡笑阻下嗟時歲侵容衰曉窗鏡思苦秋絃琴一章
錦繡段八韻瓊瑤音何以報珍重慚無雙南金

立秋日曲江憶元九

下馬柳陰下獨上隄上行故人千萬里新蟬三兩聲城
中曲江水上江陵城兩地新秋思應同此日情

早朝賀雪寄陳山人

長安盈尺雪早朝賀君喜將赴銀臺門始出新昌里上
堤馬蹄滑中路蠟燭死十里向北行寒風吹破耳待漏
午門外候對三殿裏鬚鬢凍生冰衣裳冷如水忽思仙
遊谷暗謝陳居士暖覆褐裘眠日高應未起

初與元九別後忽夢見之及寤而書適至兼寄

桐花詩悵然感懷因以此寄

元九初
謫江陵

永壽寺中語新昌坊北分歸來數行淚悲事不悲君悠
悠藍田路自去無消息計君食宿程已過商山北昨夜

雲四散千里同月色曉來夢見君應是君相憶夢中握
君手問君意何如君言苦相憶無人可寄書覺來未及
說叩門聲冬冬言是商州使送君書一封枕上忽驚起
顛倒著衣裳開緘見手扎一紙十三行上論遷謫心下
說離別腸心腸都未盡不暇叙炎涼云作此書夜夜宿
商州東獨對孤燈坐陽城山館中夜深作書畢山月向
西斜月下何所有一樹紫桐花桐花半落時復道正相
思殷勤書背後兼寄桐花詩桐花詩八韻思緒一何深

以我今朝意想君此夜心一章三遍讀一句十回吟珍
重八十字字字化為金

和元九悼往

感舊蚊
慙作

美人別君去自去無處尋舊物零落盡此情安可任唯
有襜紗幌塵埃日夜侵馨香與顏色不似舊時深透影
燈耿耿籠光月沉沉中有孤眠客秋涼生夜衾舊宅牡
丹院新墳松柏林夢中咸陽淚覺後江陵心含此隔年
恨發為中夜吟無論君自感聞者欲沾襟

重到渭上舊居

舊居清渭曲開門當蔡渡十年方一還幾欲迷歸路追
思昔日行感傷故游處插柳作高林種桃成老樹因驚
成人者盡是舊童孺試問舊老人半為遶村墓浮生同
過客前後遞來去白日如弄珠出沒光不住人物日改
變舉目悲所遇回念念我身安得不衰暮朱顏銷不歇
白髮生無數唯有山門外三峰色如故

白髮

白髮知時節暗與我有期今朝日陽裏梳落數莖絲家
人不慣見憫然為我悲我云何足怪此意爾不知凡人
年三十外壯中已衰但思寢食味已減二十時况我今
四十本來形貌羸書魔昏兩眼酒病沉四肢親愛日零
落在者仍別離身心久如此白髮生已遲由來生老死
三病長相隨除却念無生人間無藥治

秋日

池殘寥落水窗下悠揚日娟娟秋風多槐花半成實下

有獨立人年來四十一

將之饒州江浦夜泊

明月滿深浦
愁人卧孤舟
煩冤寢不得
夏夜長於秋
苦乏衣食資
遠為江海游
光陰坐遲暮
鄉國行阻修
身病向鄱陽
家貧寄徐州
前事與後事
豈堪心併憂
憂來起長望
但見江水流
雲樹藹蒼蒼
煙波淡悠悠
故園迷處所
一念堪白頭

思歸

時初為校書郎

養無晨昏膳隱無伏臘資遂求及親祿俸俛來京師薄
俸未及親別家已經時冬積溫席戀春違采蘭期夏至
一陰生稍稍夕漏遲塊然抱愁者長夜獨先知悠悠鄉
關路夢去身不隨坐惜時節變蟬鳴槐花枝

冀城北原作

野色何莽蒼去聲秋聲亦蕭疎風吹黃埃起落日驅征車
何代此開國封疆百里餘古今不相待朝市無常居昔
人城邑中今變為丘墟昔人墓田中今化為里閭廢興

相催迫日月互居諸世變無遺風焉能知其初行人千載後懷古空踟躕

客路感秋寄明準上人

日暮天地冷雨霽山河清長風從西來草木凝秋聲已感歲條忽復傷物凋零孰能不慙悽天時牽人情借問空門子何法易修行使我忘得心不教煩惱生

游襄陽懷孟浩然

楚山碧岩岩漢水碧湯湯秀氣結成象孟氏之文章今

我諷遺文思人至其鄉清風無人繼日暮空襄陽南望
鹿門山藹若有餘芳舊隱不知處雲深樹蒼蒼

秋暮西歸途中書情

耿耿旅燈下愁多常少眠思鄉貴早發發在雞鳴前九
月草木落平蕪連遠山秋陰和曙色萬木蒼蒼然去秋
偶東游今秋始西旋馬瘦衣裳破別家來二年憶歸復
愁歸歸無一囊錢心雖非蘭膏安得不自燃

秋懷

月出照北堂光華滿階墀涼風從西至草木日夜衰桐
柳減綠陰蕙蘭消碧滋感物私自念我心亦如之安得
長少壯盛衰迫天時人生如石火為樂長苦遲

別楊穎士盧克業殷堯藩

倦鳥暮歸林浮雲晴歸山獨有行路子悠悠不知還人
生苦營營終日羣動間所務雖不同同歸於不閒扁舟
來楚鄉疋馬往秦關離憂繞心曲宛轉如循環且持一
杯酒聊以開愁顏

題贈定光上人

二十身出家四十心離塵得徑入大道乘此不退輪一
坐十五年林下秋復春春花與秋氣不感無情人我來
如有悟潛以心照身誤落間見中憂喜傷形神安得遺
耳目冥然反天真

祇役駱口驛喜蕭侍御書至兼覩新詩吟諷通

宵因寄八韻

時為
厓尉

日暮心無憀吏役正營營忽驚芳信至復與新詩并是

時天無雲山館有月明月下讀數遍風前吟一聲一吟
三四歎聲盡有餘清雅哉君子文詠性不詠情使我靈
府中鄙怯不得生始知聽韶護可使心和平

酬李少府曹長官舍見贈

低腰復欽手心體不遑安一落風塵下始

一作方

知為吏

難公事與日長宦情隨歲闌惆悵青袍袖芸香無半殘
賴有李夫子此懷聊自寬兩心如止水彼此無波瀾往
往簿書暇相勸強為歡白馬晚蹋雪綠觴春煖寒戀

月夜同宿愛山晴共看野性自相近不是為同官

留別

秋涼卷朝簾春煖撤夜衾雖是無情物欲別尚沉吟況
與有情別別隨情淺深二年歡笑意一旦東西心獨留
誠可念同行力不任前事詎能料後期諒難尋唯有潺
湲淚不惜共沾襟

曉別

曉鼓聲已半離筵坐難久請君斷腸歌送我和淚酒月

落欲明前馬嘶初別後浩浩暗塵中何由見回首

北園

北園東風起雜花次第開心知須臾落一日三四來花
下豈無酒欲酌復遲迴所思眇千里誰勸我一杯

惜桺李花

花細而繁色豔而黯亦花中之
有思者連衰易落故惜之耳

樹小花鮮妍香繁條軟弱高低二三尺重疊千萬萼朝
豔藹霏霏夕凋紛漠漠辭枝朱粉細覆地紅綃薄由來
好顏色常苦易銷爍不見良蕩花狂風吹不落

照鏡

皎皎青銅鏡斑斑白絲鬢
豈復更歲年實年君不信

新秋

西風飄一葉庭前颿已涼
風池明月水衰蓮白露房
其奈江南夜縣縣自此長

夜雨

早蛩啼復歇殘燈滅又明
隔窗知夜雨芭蕉先有聲

秋江送客

秋鴻次第過哀猿朝夕聞是日孤舟客此地亦離羣濛濛潤衣雨漠漠冒帆雲不醉潯陽酒煙波愁殺人

感逝寄遠

寄通州元侍御果州崔員外
澧州李舍人鳳州李郎中

昨日聞甲死今朝聞乙死知識三分中二分化為鬼逝者不復見悲者長已矣存者今如何去我皆萬里平生知心者屈指能有幾通果澧鳳州眇然四君子相思俱老大浮世如流水應歎舊交遊凋零日如此何當一杯酒開眼笑相視

秋月

夜初色蒼然夜深光浩然稍轉西廊下漸滿南窗前
况是綠蕪地復茲清露天落葉聲策策驚鳥影翩翩棲禽
尚不穩愁人安可眠



白香山詩集卷九

欽定四庫全書

集部

白香山詩集卷十一

詳校官監察御史臣查瑩

檢討臣何思鈞覆勘

覆校官中書臣康儀鈞

校對官中書臣吳裕德

謄錄監生臣湯師錫

謄錄監生臣沈希曾

欽定四庫全書

白香山詩集卷十

欽縣汪立名編

長慶集十

感傷古調詩
七十八首

朱陳村

徐州古豐縣有村曰朱陳去縣百餘里桑麻青氤氲機
梭聲札札牛驢走紆紆安汲澗中水男採山上薪縣遠
官事少山深人俗淳有財不行商有丁不入軍家家守
村業頭白不出門生為村之民死為村之塵田中老與

幼相見何欣欣一村唯兩姓世世為婚姻

其村唯朱陳二姓而已

親疎居有族少長游有羣黃雞與白酒歡會不隔旬生
者不遠別嫁娶先近鄰死者不遠葬墳墓多遠村既安
生與死不苦形與神所以多壽考往往見玄孫我生禮
義鄉少小孤且貧徒學辨是非祇自取辛勤世法貴名
教士人重冠婚以此自桎梏信為大謬人十歲解讀書
十五能屬文二十舉秀才三十為諫臣下有妻子累上
有君親恩承家與事國望此不肖身憶昨旅遊初迄今

十五春孤舟三適楚羸馬四經秦
畫行有飢色夜寢無安魂東西不
暫住來往若浮雲離亂失故鄉骨
月多散分江南與江北各有平生
親平生終日別逝者隔年聞朝憂
卧至暮夕哭坐達晨悲火燒心曲
愁霜侵鬢根一生苦如此長羨村
中民

讀鄧魴詩

塵架多文集偶取一卷披未及看
姓名疑是陶潛詩者名知是君惻
惻令我悲詩人多蹇厄近日誠有
之京兆

杜子美猶得一拾遺襄陽孟浩然亦聞鬢成絲嗟君兩
不如三十在布衣擢第祿不及新婚妻未歸少年無疾
患溘死於路岐天不與爵壽唯與好文詞此理勿復道
巧歷不能推

寄元九

自此後在
渭村作

晨雞纔發聲夕雀俄歛翼晝夜往復來疾如出入息非
徒改年貌漸覺無心力自念因念君俱為老所逼君年
雖校少頗頽謫南國三年不放歸炎瘴消顏色山無殺

草霜水有含沙蜮健否遠不知書多隔年得願君少愁
苦我亦加飡食各保金石軀以慰長相憶

秋夕

葉聲落如雨月色白似霜夜深方獨卧誰為拂塵牀

夜雨

我有所念人隔在遠遠鄉我有所感事結在深深腸鄉
遠去不得無日不瞻望腸解不得無夕不思量況此
殘燈夜獨宿在空堂秋天殊未曉風雨正蒼蒼不學頭

陀法前心安可忘

秋霽

金火不相待炎涼雨中變秋晴有殘蟬巢冷無留燕沉
吟卷長簾愴惻收團扇向夕稍無泥閒步青苔院月出
砧杵動家家擣秋練獨對多病妻不能理針線冬衣殊
未製夏服行將綻何以迎早秋一杯聊自勸

歎老三首

晨興照青鏡形影兩寂寞少年辭我去白髮隨梳落萬

化成於漸漸衰者不覺但恐鏡中顏今朝老於昨人生
少滿百不得長歡樂誰會天地心千齡與龜鶴吾聞善
醫者今古稱扁鵲萬病皆可治唯無治老藥

我有一握髮梳理何稠直昔似玄雲光今如素絲色匣
中有舊鏡欲照先歎息自從頭白來不欲明磨拭顰頭
與鶴頸至老常如墨獨有人鬚毛不得終身黑

前年種桃核今歲成花樹去歲新嬰兒今年已學步但
驚物長成不覺身衰暮去矣欲何如少年留不住因書

今日意偏寄諸親故壯歲不歡娛長年當悔悟

送兄弟回雪夜

日晦雲氣黃東北風切切時從村南還新與兄弟別離
襟淚猶濕迴馬嘶未歇欲歸一室坐天陰多無月夜長
火消盡歲暮雨凝結寂寞滿爐灰飄零上堦雪對雪畫
寒灰殘燈明復滅灰死如我心雪白如我髮所遇皆如
此頃刻堪愁絕迴念入坐忘轉憂作禪悅平生洗心法
正為今宵設

溪中早春

南山雪未盡陰嶺留殘白西澗冰已消春溜含新碧東
風來幾日蟄動萌草坼潛知陽和功一日不虛擲愛此
天氣暖來拂溪邊石一坐欲忘歸暮禽聲嘖嘖蓬蒿隔
桑棗隱映煙火夕歸來問夜飧家人烹薺麥

同友人尋澗花

聞有澗底花貫得村中酒與君來校遲已逢搖落後臨
觴有遺恨悵望空溪口記取花發時期君重攜手我生

日日老春色年年有且作來歲期不知身健否

登村東古冢

高低古時冢上有牛羊道獨有最高頭悠哉此懷抱回
頭向村望但見荒田草村人不愛花多種粟與棗自來
此村住不覺風光好花少鶯亦稀年年春暗老

夢裴相公

五年生死隔一夕魂夢通夢中如往日同直金鑾宮髣
髴金紫色分明冰玉容勤勤相眷意亦與平生同既寤

知是夢憫然情未終追想當時事何殊昨夜中自我學
心法萬緣成一空今朝為君子流涕一沾胸

晝寢

坐整白單衣起穿黃草屨朝飧盥漱畢徐下階前步暑
風微變候晝刻漸加數院靜地陰陰鳥鳴新葉樹獨行
還獨卧夏景殊未暮不作午時眠日長安可度

別行簡

時行簡辟廬坦
劍南東川府

漠漠病眼花星星愁鬢雪筋骸已衰憊形影仍分訣梓

州二千里劍門五六月豈是遠行時火雲燒棧熱何言
巾上淚乃是腸中血念此早歸來莫作經年別

觀兒戲

韶齒七八歲綺紈三四兒弄塵復鬪草盡日樂嬉嬉堂
上長年客鬚間新有絲一看竹馬戲每憶童騃時童騃
饒戲樂老大多憂悲靜念彼與此不知誰是癡

歎常生

西村常氏子卧病不須史前旬猶訪我今日忽云殂時

我病多暇與之同野居園林青藹藹相去數里餘村鄰
無好客所遇唯農夫之子何如者往還猶勝無于今亦
已矣可為一長吁

寄元九

一病經四年親朋書信斷窮通合一作各易交自笑知何

晚元君在荆楚去日雖云遠彼獨是何人心如石不轉
憂我貧病身書來唯勸勉上言少愁苦下道加飧飯憐
君為謫吏窮薄家貧褊三寄衣食資數盈二十萬豈是

貧衣食感君心
繾綣念我口中食
分君身上暖
不因身病久
不因命多蹇
平生親友心
豈得知深淺

以鏡贈別

人言似明月
我道勝明月
明月非不明
一年十二缺
豈如玉匣裏
如水常澄澈
月破天暗時
圓明獨不歇
我慙貌醜老
繞鬢斑斑雪
不如贈少年
迴照青絲髮
因君千里去
持此將為別

城上對月期友人不至

古人惜晝短，勸令秉燭遊。況此迢迢夜，明月滿西樓。復
有尊一作盈尊中酒，置在城上頭。期君君不至，人月兩悠悠。
照水煙波白，照人肌髮秋。清光正如此，不醉即須愁。

念金鑾子二首

衰病四十身，嬌癡三歲女。非男猶勝無，慰情時一撫。
一朝舍我去，魂影無處所。況念天札時，嘔啞初學語。始知
骨肉愛，乃是憂悲聚。唯思未有前，以理遣傷苦。忘懷日
已久，三度移寒暑。今日一傷心，因逢舊乳母。

立名按芥隱筆談樂天多用淵明詩如衰病四十身
嬌癡三歲女非男猶勝無慰情時一撫正用陶詩弱
女雖非男慰情良勝無淵明有五
男兒此詩或作於未得子之前也

與爾為父子八十有六旬忽然又不見邇來三四春形
質本非實氣聚偶成身恩愛元是妄緣合暫為親念茲
庶有悟聊用遣悲辛暫將理自奪不是忘情人

對酒

人生一百歲通計三萬日何況百歲人人間百無一賢
愚共零落貴賤同埋沒東岱前後魂北邙新舊骨復間

藥誤者為憂延年術又有憂死者為貧政事筆藥誤不
得老憂死非因疾誰言人最靈知得不知失何如會親
友飲此杯中物能沃煩慮消能陶真性出所以劉阮輩
終年醉兀兀

渭村雨歸

渭水寒漸落離離蒲稗苗閒傍沙邊立看人刈葦苔近
水風景冷晴明猶寂寥復茲夕陰起野思重蕭條蕭條
獨歸路暮雨濕村橋

諭懷

黑頭日已白白面日已黑人生未死間變化何終極常
言在已者莫若形與色一朝改變來止過不能得况彼
身外事悠悠通與塞

喜友至留宿

村中少賓客柴門多不開忽聞車馬至云是故人來况
值風雨夕愁心正悠哉願君且同宿盡此手中杯人生
開口笑百年都幾回

西原晚望

花菊引開行

一作步

行上西原路原上晚無人因高聊四

顧南阡有煙火北陌連墟墓村鄰何蕭疎近者猶百步
吾廬在其下寂寞風日暮門外轉枯蓬籬根伏寒兔故
園汴水上離亂不堪去近歲始移家飄然此村住新屋
五六間古槐八九樹便是衰病身此生終老處

感鏡

美人與我別留鏡在匣中自從花顏去秋水無芙蓉經

年不開匣紅埃覆青銅今朝一拂拭自顧顚顚容照罷
重惆悵背有雙盤龍

村居卧病三首

戚戚抱羸病悠悠度朝暮夏木纔結陰秋蘭已含露前
日巢中卵化作雛飛去昨日穴中蟲蛻為蟬上樹四時
未嘗歇一物不暫住唯有病客心沉然獨如故

新秋久病客起步村南道盡日不逢人蟲聲徧荒草西
風吹白露野綠秋仍早草木猶未傷先傷我懷抱朱顏

與玄鬢強健幾時好況為憂病侵不得依年老

種黍三十畝雨來苗漸大種薤二十畦秋來欲堪刈望
黍作冬酒留薤為春菜荒村百物無待此養衰瘵昔盧
備陰雨補褐防寒歲病身知幾時且作明年計

沐浴

經年不沐浴塵垢滿肌膚今朝一澡濯衰瘦頗有餘老
色頭鬢白病形支體虛衣寬有勝帶髮少不勝梳自問
今年幾春秋四十初四十已如此七十復何如

栽松二首

小松未盈尺心愛手自移
蒼然澗底色雲濕煙霏霏
栽植我年晚長成君性遲
如何過四十種此數寸枝
得見成陰否人生七十稀

愛君抱晚節憐君含直文
欲得朝朝見堦前故種君
知君死則已不死會凌雲

病中友人相訪

卧久不記日南窗昏復昏
蕭條草簷下寒雀朝夕聞
強

扶牀前杖起向庭中行偶逢故人至便當一逢迎移榻就斜日披裘倚前楹閒談勝服藥稍覺有心情

自覺二首

四十未為老憂傷早衰惡前歲二毛生今年一齒落形骸日損耗心事同蕭索夜寢與朝飧其間味亦薄同歲崔舍人容光方灼灼始知年與貌衰盛隨憂樂畏老老轉逼憂病病彌縛不畏復不憂是除老病藥

朝哭心所愛暮哭心所親親愛零落盡安用身獨存幾

許平生歡無限骨肉恩結為腸間痛聚作鼻頭辛悲來
四支緩泣盡雙眸昏所以年四十心如七十人我間浮
圖教中有解脫門置心為止水視身如浮雲斗擻垢穢
衣度脫生死輪胡為戀此苦不去猶逡巡回念發弘願
願此現在身但受過去報不結將來因誓以智慧水永
洗煩惱塵不將恩愛子更種悲憂根

夜雨有念

以道治心氣終歲得晏然何乃戚戚意忽來風雨天既

非慕榮顯又不恤飢寒胡為悄不樂抱膝殘燈前形影
暗相問心默對以言骨肉能幾人各在天一端吾兄寄
宿州吾弟客東川南北五千里吾身在中間欲去病未
能欲住心不安有如波上舟此縛而彼牽自我向道來
于今六七年鍊成不二性消盡千萬緣唯有恩愛火往
往猶熬煎豈是樂無効病多難盡蠲

寄楊六

楊攝萬年縣尉
予為贊善大夫

青宮官冷靜亦縣事繁劇一閒復一忙動作經時隔清

觴久廢酌白日頓虛擲念此勿踟躕悄然心不適豈無
舊交結久別或遷易亦有新往還相見多形迹唯君於
我分堅久如金石何況老大來人情重姻戚會稀歲月
急此事真可惜幾回開口笑便到髭鬚白公門苦鞅掌
盡一作畫日無閒隙猶冀乘暝來靜言同一夕

送春

三月三十日春歸日復暮惆悵問春風明朝應不住送
春曲江上眷眷東西顧但見撲水花紛紛不知數人生

似行客兩足無停步日日進前程前程幾多路
兵刀與水火盡可違之去唯有老到來人間無
避處感時良為已獨倚池南樹今日送春心心
如別親故

哭李三

去年渭水曲秋時訪我來今年常樂里春日哭
君回哭君仰問天天意安在哉若必奪其壽何
如不與才落然身後事妻病女嬰孩

別李十一後重寄

自此後詩在江州路上作

秋日正蕭條驅車出蓬華回望青門道目極心鬱鬱豈
獨戀鄉土非關慕簪紱所愴別李君平生同道術俱承
金馬詔聯秉諫臣筆共上青雲梯中途一相失江湖我
方往朝廷君不出蕙帶與華簪相逢是何日

初出藍田路作

停驂問前路路在

一作指

秋雲裏蒼蒼縣南道

一作山

去

一作作

險途從此始絕頂忽盤上

一作上盤

衆山皆下視下視千萬

峰峰頭如浪起朝經韓公坂夕次藍橋水潯陽僅

一作近

四千始行七十里人煩馬蹄踣勞苦已一作如此

仙娥峰下作

我為東南行始登高山道高山無數峰最愛仙娥好參
差樹若插匝匝雲如抱渴望寒玉泉香聞紫芝草青崖
屏削碧白石牀鋪縞向無如此物安足留四皓感彼私
自問歸山何不早可能塵土中還隨衆人老

微雨夜行

漠漠秋雲起稍稍一作悄悄夜寒生但覺衣裳濕無點亦無

聲

再到襄陽訪問舊居

昔到襄陽日髣髴初有髭今過襄陽日髭鬚半成絲舊
遊都是一作似夢乍到忽如歸東郭蓬蒿宅荒涼今屬誰
故知多零落間井亦遷移獨有秋江水煙波似舊時

寄微之三首

江州望通州天涯與地末有山萬丈高有江千里濶間
之以雲霧飛鳥不可越誰知千古險為我二人設通州

君初到鬱鬱愁如結江州我方去迢迢行未歇道路日
乖隔音信日斷絕因風欲寄語地遠聲不徹生當復相
逢死當從此別

君遊襄陽日我在長安住今君在通州我過襄陽去襄
陽九里郭樓堆連雲樹顧此稍依依是君舊遊處蒼茫
蒹葭水中有尋陽路此去更相思江西少親故

去國日已遠喜一作稀逢物似人如何含此意江上坐思

君有如河嶽氣相合方氛氲狂風吹中絕兩處成孤雲

風迴終有時雲合豈無因努力各自愛窮通我爾身

舟中雨夜

江雲暗悠悠江風冷修修夜雨滴船背夜浪打船頭船
中有病客左降向江州

夜間歌者

宿鄂州

夜泊鸚鵡洲秋江月澄徹

一作江月
秋澄澈

鄰船有歌者發調

堪愁絕歌罷繼以泣泣聲通復咽尋聲見其人有婦顏
如雪獨倚帆檣立娉婷十七八夜淚似真珠雙雙墮明

月借問誰家婦歌泣何淒切一問一沾襟

一作巾

低眉終

一作竟不說

江樓閒砧

江州作

江人授衣晚十月始聞砧一夕高樓月萬里故園心

宿東林寺

經窗燈燄短僧爐火氣深索落廬山夜風雪宿東林

憶洛下故園

時淮汝冠戎未減

潯陽遷謫地洛陽離亂年煙塵三川上炎瘴九江邊鄉

心坐如此秋風仍颯然

贈別崔五

朝送南去客暮迎北來賓孰云當大路少遇心所親勞
者念息肩熱者思濯身何如愁獨日忽見平生人平生
已不淺是日重殷勤問從何處來及此江亭春江天春
多陰夜月隔重雲移尊樹間飲燈照花紛紛一會不易
得餘事何足云明旦又分手今夕且歡欣

春晚寄微之

三月江水闊悠悠桃花波年芳與心事此地共蹉跎南
國方譴謫中原正兵戈眼前故人少頭上白髮多通州
更迢遞春盡復如何

漸老

今朝復明旦不覺年齒暮白髮逐梳落朱顏辭鏡去當
春頗愁寂對酒寡歡趣遇境多愴辛逢人益敦故形質
屬天地推遷從不住所怪少年心銷磨落何處

送幼史

淮右寇未散江西歲再徂故里干戈地行人風雪途此
時與爾別江畔立踟躕

夜雪

已訝衾枕冷復見窗戶明夜深知雪重時聞折竹聲

寄行簡

鬱鬱眉多歛默默口寡言豈是願如此舉目誰與歡去
春爾西征從事已蜀間今春我南謫抱疾江海隅相去
六千里地絕天邈然十書九不達何以開憂顏渴人多

夢飲飢人多夢殮春來夢何處合眼到東川

首夏

孟夏百物滋動植一時好麋鹿樂深林蟲蛇喜豐草翔
禽愛密葉游鱗悅新藻天和遺漏處而我獨枯槁一身
在天末骨肉皆遠道舊國無來人冠戎塵浩浩沉憂竟
何益祇自勞懷抱不如放身心冥然任天造潯陽多美
酒可使杯不燥湓魚賤如泥烹炙無昏早朝飯山下寺
暮醉湖中島何必歸故鄉茲焉可終老

孟夏思渭村舊居寄舍弟

嘖嘖雀引雛稍稍筍成竹時物感人情憶我故鄉曲故
園渭水上十載事樵牧手種榆柳成陰陰覆墻屋免隱
豆苗肥鳥一作犬鳴桑椹熟前年當此時與爾同遊矚詩

書課弟姪農圃資童僕日暮麥登場天晴蠶拆簇弄泉
南澗坐待月東亭宿興發飲數杯悶來碁一局一朝忽
分散萬里仍羈束井鮒思反泉籠鶯悔出谷九江地卑
濕四月天炎燠苦雨初入梅瘴雲稍含毒泥秧水畦稻

灰種畬田粟已訖殊歲時仍嗟異風俗閒登郡樓望日
落江山綠歸雁拂鄉心平湖斷人目殊方我漂泊舊居
君幽獨何時同一瓢飲水心亦足

早蟬

六月初七日江頭蟬始鳴石楠深葉裏薄暮兩三聲一
催衰鬢色再動故園情西風殊未起秋思先秋生憶昔
在東掖宮槐花下聽今朝無限思雲樹遠湓城

感情

中庭曬服玩忽見故鄉履昔贈我者誰東鄰嬋娟子因
思贈時語特用結終始永願如履綦雙行復雙止自吾
謫江都漂蕩三千里為感長情人提攜同到此今朝一
惆悵反覆看未已人隻履猶雙何曾得相似可嗟復可
惜錦表繡為裏況經梅雨來色黯花草死

南湖晚秋

八月白露降湖中水芳老旦夕秋風多衰荷半傾倒手
攀青楓樹足躡黃蘆草慘淡老容顏零一作冷落秋懷抱

有兄在淮楚有弟在蜀道萬里何時來煙波白浩浩

郡廳有樹晚榮早凋人不識名因題其上

潯陽郡廳後有樹不知名秋先梧桐落春後桃李榮五
月始萌動八月已凋零左右皆松桂四時鬱青青豈量
雨露恩沾濡不均平榮枯各有分天地本無情顧我亦
相類早衰向晚成形骸少多病三十不豐盈毛鬢早改
變四十白髭生誰教兩蕭索相對此江城

感秋懷微之

葉下湖又波秋風此時至誰知獲落心先納蕭條氣推
移感流歲漂泊思同志昔為煙霄侶今作泥塗吏白鷗
毛羽弱青鳳文章異各閒一作開一籠中歲晚同顛顛

因沐感髮寄朗上人二首

年長身轉慵百事

一作年

無所欲乃至頭上髮經年方一

沐沐稀髮苦落一沐仍半禿短鬚經霜蓬老面辭春木
強年過猶近衰相來何速應是煩惱多心焦血不足
漸少不滿把漸短不盈尺況茲短少中日夜落復白既

無神仙術何除老死籍祇有解脫門能度衰苦厄掩鏡
望東寺降心謝禪客衰白何足言剃落猶不惜

早蟬

月出先照山風生先動水亦如早蟬聲先入閒人耳一
聞愁意結再聽鄉心起渭上新一作村蟬聲先聽渾相似

衡門有誰聽日暮槐花裏

苦熱喜涼

經時苦炎熱一作暑心體但煩倦白日一何長清秋不可

見歲功成者去天數極則變潛知寒燠間遷次如乘傳
火雲忽朝歛金風俄夕扇枕簟遂清涼筋骸稍輕健因
思望月侶好卜迎秋宴竟夜無客來引杯還自勸

早秋晚望兼呈韋侍御

九派繞孤城城高生遠思人煙半在船野水多於地穿
霞日脚直驅鴈風頭利去國來幾時江上秋三至夫君
亦淪落此地同飄寄憫默向隅心推顏觸籠翅且謀眼
前計莫問胷中事潯陽酒甚濃相勸時時醉

司馬宅

雨徑綠蕪合霜園紅葉多
蕭條司馬宅門巷無人過
唯對大江水秋風朝夕波

司馬廳獨宿

荒涼滿庭草偃亞侵簷竹
府吏下廳簾家僮開被幙
數聲城上漏一點窗間燭
官曹冷似冰誰肯來同宿

夢與李七庾三十三同訪元九

夜夢歸長安見我故親友
損之在我左順之在我右
云

是二月天春風出攜手同過靖安里下馬尋元九元九
正獨坐見我笑開口還指西院花仍開北亭酒如言各
有故似惜歡難久神合俄頃間神離久伸後覺來疑在
側求索無所有殘燈影閃牆斜月光穿牖天明西北望
萬里君知否老去無見期踟躕搔白首

秋瑾

風露颯已冷天色亦黃昏中庭有槿花榮落同一晨秋
開已寂寞夕殞何紛紜正憐少顏色復歎不遂巡感此

因念彼懷哉聊一陳男兒老富貴女子晚婚姻頭白始
得志色衰方事人後時不獲已安得如青春

答元郎中楊員外喜烏見寄

四十四
字成

南宮鴛鴦地何忽烏來止故人錦帳郎間烏笑相視疑
烏報消息望我歸鄉里我歸應待烏頭白慙媿元郎誤
歡喜

白香山詩集卷十

欽定四庫全書

白香山詩集卷十一

歙縣汪立名編

長慶集十一

感傷古體五言
凡五十三首

初入峽有感

上有萬仞山下有千丈水蒼蒼兩崖間闊狹容一葦瞿
塘呀直瀉艷瀕屹中峙未夜黑岩昏無風白浪起大石
如刀劒小石如牙齒一步不可行況千三百里

自峽州
至忠州

灘險相繼凡
一千三百里

葦蕩竹筏簃

音念

歌危檝師趾一跌無完舟

吾生繫於此常聞仗忠信蠻貊可行矣自古漂沉人豈盡非君子況吾時與命蹇舛不足恃常恐不才身復作無名死

過昭君村

村在歸州東北四十里

靈珠產無種彩雲出無根亦如彼姝子生此遐陋村至麗物難掩遽選入君門獨美衆所嫉終棄於塞垣唯此希代色豈無一顧恩事排勢須去不得由至尊白黑既可變丹青何足論竟埋代北骨不返巴東魂慘淡晚雲

水依稀舊鄉園妍姿化已久但有村名存村中有遺老
指點為我言不取往者戒恐貽來者寃至今村女面燒
灼成癍痕

自江州至忠州

前在潯陽日已歎賓朋寡忽忽抱憂懷出門無處寫今
來轉深僻窮峽巔山下五月斷行舟滯堆正如馬巴人
類猿狖矍鑠滿山野敢望見交親喜逢似人者

初到忠州登東樓寄萬州楊八使君

山東邑居窄峽牽氣候偏林巒少平地霧雨多陰天隱
隱煮鹽火漠漠燒畬煙賴此東樓夕風月時脩然憑軒
望所思目斷心涓涓背春有去鴈上水無來船我懷巴
東守本是關西賢平生已不淺流落重相憐水梗漂萬
里籠禽囚五年新恩同雨露遠郡鄰山川書信雖往復
封疆徒接連其如美人面欲見杳無緣

郡中

鄉路音信斷山城日月遲欲知州近遠階前摘荔枝

西樓夜

悄悄復悄悄城隅隱林杪山郭燈火稀峽天星漢少年
光東流水生計南枝鳥月沒江沉沉西樓殊未曉

東樓曉

脉脉復脉脉東樓無宿客城暗雲霧多峽深田地窄宵
燈尚留燄晨禽初展翮欲知山高低不見東方白

寄王質夫

憶始識君時愛君世緣薄我亦吏王畿不為名利著春

尋仙遊洞秋上雲居閣樓觀水潺潺龍潭花漠漠吟詩
石上坐引酒泉邊酌因話出處心心期老巖壑忽從風
雨別遂被簪纓縛君作出山雲我為入籠鶴籠深鶴恹
悴山遠雲飄泊去處雖不同同負平生約今來各何在
老去隨所託我守巴南城君佐征西幕年顏漸衰颯生
計仍蕭索方舍去國愁且羨從軍一作君樂舊遊疑是夢
往事思如昨相憶春又深故山花正落

南賓郡齋即事寄楊萬州

山上巴子城山下巴江水中有窮獨人強名為刺史時

時竊自哂刺史如是倉粟餒家人黃練裹妻子

忠州刺史

已下悉以畬田粟給祿食黃絹支俸

莓苔翳冠帶霧雨霾樓雉衙鼓暮復

朝郡齋卧還起回頭

一作首

望南浦亦在煙波裏而我復

何嗟夫君猶滯此

招蕭處士

峽內豈無人所逢非所思門前亦有客相對不相知仰
望但雲樹俯顧惟妻兒寢食起居外端然無所為東郊

蕭處士聊可與開肴能飲滿杯酒善吟長句詩庭前吏
散後江畔路乾時請君攜竹杖一赴郡齋期

庭槐

南方饒竹樹唯有青槐稀十種七八死縱活亦支離何
此郡庭下一株獨華滋蒙蒙碧煙葉嫋嫋黃花枝我家
渭水上此樹陰前墀忽向天涯見憶在故園時人生有
情感遇物牽所思樹木猶復爾況見舊親知

送客回晚興

城上雲霧開沙頭風浪定參差亂山出淡沔平江淨行
客舟已遠居人酒初醒嫋嫋秋竹梢已蟬聲似磬

東樓竹

瀟灑城東樓遶樓多修竹森然一萬竿白粉封青玉卷
簾睡初覺欹枕看未足影轉色入樓牀席生浮綠空城
絕賓客向夕彌幽獨樓上夜不歸此君留我宿

九日登巴臺

黍香酒初熟菊暖花未開閒聽竹枝曲淺酌茱萸杯去

年重陽日漂泊溫城隈
今歲重陽日蕭條巴子臺
旅鬢尋已白鄉書久不來
臨觴一搔首座客亦徘徊

東城尋春

老色日上面歡情日去心
今既不如昔後當不如今
今猶未衰甚每事力可任
花時仍愛出酒後尚能吟
但恐如此興亦隨日消沉
東城春欲老勉強一來尋

江上送客

江花已萎絕江草已消歇
遠客何處歸孤舟今日發
杜

鵲聲似哭湘竹斑如血共是多感人仍為此中別

桐花

春令有常候清明桐始發何此巴峽中桐花開十月豈
伊物理變信是土宜別地氣反寒暄天時倒生殺草木
堅強物所稟固難奪風候一參差榮枯遂乖刺況吾北
人性不耐南方熱強羸壽天間安得依時節

早祭風伯因懷李十一舍人

遠郡雖褊陋時祀奉朝經夙興祭風伯天氣曉冥冥導

騎與從吏引我出東垌水霧重如雨山火高於星忽憶
早朝日與君趨紫庭步登龍尾道却望終南青一別身
向老所思心未寧至今想在耳玉音尚玲玲

花下對酒二首

藹藹江氣春南賓閏正月梅櫻與桃杏次第城上發紅
房爛簇火素豔紛團雪香惜委風飄愁牽壓枝折樓中
老太守頭上新白髮冷淡病心情暄和好時節故園音
信斷遠郡親賓絕欲問花前尊依然為誰設

引手攀紅櫻紅櫻落似霰
仰首看白日白日走如箭
年芳與時景頃刻猶衰變
況是血肉身安能長強健
人心苦迷執慕貴憂貧賤
愁色常在眉歡容不上面
況吾頭半白把鏡非不見
何必花下杯更待他人勸

不二門

兩眼日將闔四肢漸衰瘦
束帶臄昔圍穿衣妨去聲寬袖
流年似江水奔注無昏晝
志氣與形骸安得長依舊
亦曾登玉陛舉措多紕繆
至今金闕籍名姓獨遺漏
亦曾

燒大藥消息乖火候至今殘丹砂燒乾不成就行藏事
兩失憂惱心交鬪化作顛顛翁拋身在荒陋坐看老病
逼須得醫王救唯有不二門其間無天壽

我身

我身何所似似彼孤生蓬秋霜剪根斷浩浩隨長風昔
游秦雍間今落巴蠻中昔為意氣郎今作寂寞一作寥翁

外貌雖寂寞中懷頗冲融賦命有厚薄委心任窮通通
當為大鵬舉翅摩蒼穹窮則為鷦鷯一枝足自容苟知

此道者身窮心不窮

哭王質夫

仙遊寺前別別來十年餘生別猶怏怏死別復何如客
從梓潼來道君死不虛驚疑心未信欲哭復踟蹰
寢門側聲發淚亦俱衣上今日淚篋中前月書憐君古
人風重有君子儒篇詠陶謝輩風流嵇阮徒出身既蹇
連一作連生世仍須臾誠知天至高安得不一呼江南有
毒蟒江北有妖狐皆享千年壽多於王質夫不知彼何

德不識此何辜

東坡種花二首

持錢買花樹城東坡上栽但購有花者不限桃杏

一作李

梅百果參雜種千枝次第開天時有早晚地力無高低
紅者霞豔豔白者雪皚皚遊蜂逐不去好鳥亦栖來前
有長流水下有小平臺時拂臺上石一舉風前杯花枝
蔭我頭花蕊落我懷獨酌復獨詠不覺日平西巴俗不
愛花竟春無人來唯此醉太守盡日不能迴

東坡春向暮樹木

一作下

今何如漠漠花落盡翳翳葉生

初

一作初紓

每日領童僕荷鋤仍決

一作鑿

渠剗土壅其本引

泉溉其枯小樹低數尺大樹長丈餘封植來幾時高下
齊扶疎養樹既如此養民亦何殊將欲茂枝葉必先救
根株云何救根株勸農均賦租云何茂枝葉省事寬刑
書移此為郡政庶幾叶俗蘇

立名按二老堂詩話蘇文忠公不輕許可獨敬愛樂
天屢形詩篇益其文章皆主辭達而忠厚好施剛直
盡言與人有情於物無著大略相似謫居黃
州始號東坡其原必起於樂天忠州之作也

登城東古臺

迢迢東郊上有土青崔嵬不知何代物疑是巴王臺巴
歌久無聲巴宮沒黃埃靡靡春草合牛羊緣四隈我來
一登眇目極心悠哉始見江山勢峰疊水環迴憑高視
聽曠向遠習襟開唯有故園念時從東北來

哭諸故人因寄元九

昨日哭寢門今日哭寢門借問所哭誰無非故交親偉
卿既長往質夫亦幽淪屈指數年世收涕自思身彼皆

少於我先為泉下人我今頭半白焉得身久存好懷元
郎中相識二十春昔見君生子今聞君抱孫存者盡老
大逝者已成塵早晚升平宅開筵一見君

郡中春宴因贈諸客

僕本儒家子待詔金馬門塵忝親近地孤負聖明恩一
旦奉優詔萬里牧遠人可憐島夷帥自稱為使君身騎
牂牁馬口食巴江鱗闇淡緋衫故爛斑白髮新是時歲
二月玉厯布春分頒條示皇澤命宴及良辰冉冉趨府

吏蚩蚩聚州民有如蟄蟲鳥亦應天地春薰草席鋪座
藤枝酒注尊中庭無平地高下隨所陳蠻鼓聲坎坎巴
女舞蹲蹲使君居上頭掩口語衆賓勿笑風俗陋勿欺
官府貧蜂巢一作巢與蟻穴隨分有君臣

開元寺東池早春

池水暖溫暾水清波潏潏濫簇簇青泥中新蒲葉如劍梅
房小白裏柳彩輕黃染順氣草薰薰適情鷗汎汎舊遊
成夢寐往事隨陽焱芳物感幽懷一動平生念

東澗種柳

野性愛栽植植柳水中坻乘春持斧斫裁截而樹之長
短既不一高下隨所宜倚岸埋大幹臨流插小枝松柏
不可待梗枿固難移不如種此樹此樹易榮滋無根亦
可活成陰況非遲三年未離郡可以見依依種罷水邊
憩仰頭間自思富貴本非望功名須待時不種東溪柳
端坐欲何為

卧小齋

朝起視事畢晏坐飽食終散步長廊下退卧小齋中拙政自多暇幽情誰與同孰云二千石心如田野翁

步東坡

朝上東坡步夕上東坡步東坡何所愛愛此新城樹種植當歲初滋榮及春暮信意取次栽無行亦無數綠陰斜景轉芳氣微風度新葉鳥下來萎花蝶飛去間攜斑竹杖徐曳黃麻屨欲識往來頻青苔成白路

立名按容齋隨筆東坡居黃州始自稱東坡居士其意蓋專慕樂天而然如贈寫真李道士云他時要指

集賢人知是商山老居士贈善相程傑云我似樂天
君記取華顛賞遍洛陽春送程懿叔云我甚似樂天
但無素與蠻入侍邇英云定似香山老居士世緣終
淺道緣深去杭州云出處依稀似樂天敢將衰朽較
前賢則公之所以景仰者不止一
再言之非東坡之名偶爾暗合也

徵秋稅畢題郡南亭

高城直下視蠢蠢見巴蠻安可施政教尚不通語言且
喜賦斂畢幸聞閭井安豈伊循良化賴此豐登年案牘
既簡少池館亦清閒秋雨簷果落夕鐘林鳥還南亭日
瀟灑偃卧恣踈頑

蝨蟻

巴徼炎毒早二月蚊蟻生啞膚拂不去遶耳薨薨聲斯
物頗微細中人初甚輕如有膚受譖久則瘡痂成痂成
無奈何所要防其萌麼蟲何足道潛喻儆人情

登龍昌上寺望江南山懷錢舍人

騎馬出西郭悠悠欲何之獨上高寺去一與白雲期虛
檻晚蕭洒前山碧參差忽似青龍閣同望玉峰時因詠
松雪句永懷鸞鶴姿六年不相見況乃隔榮衰

昔常與
錢舍人

登青龍寺上方同望藍田山各有絕句錢
詩云偶來上寺因高望松雪分明見舊山

立名按一統志樂天在忠州嘗植柳龍昌寺傍柳
盛則寺興柳衰則寺敗僧護此柳比之甘棠云

郊下

西日照高樹樹頭子規鳴東風吹野水水畔江蘼生盡
日看山立有時尋澗行兀兀長如此何許似專城

遣懷

樂往必悲生秦來由否極誰言此數然吾道何終塞嘗
求詹尹卜拂龜竟默默亦曾仰問天天但蒼蒼色自茲

唯委命名利心雙息近日轉安閒鄉園亦休憶回看世
間苦苦在求不得我今無所求庶離憂悲域

歲晚

霜降水返壑風落木歸山冉冉歲將晏物皆復本源何
此南遷客五年猶未還命途分已定日久心彌安亦嘗
心與口靜念私自言去國固非樂歸鄉未必歡何須自
生苦捨易求其難

負冬日

杲杲冬日出照我屋南隅
負暄閉目坐和氣生肌膚
初似飲醇醪又如蟄者蘇
外融百骸暢中適一念無
曠然忘所在心與虛空俱

委順

山城雖荒蕪竹樹有嘉色
郡俸誠不多亦足充衣食
外累由心起心寧累自息
尚欲忘家鄉誰能算官職
宜懷齊遠近委順隨南北
歸去誠可憐天涯住亦得

宿溪翁

時初除郎官赴朝

衆心愛金玉衆口貪酒肉何如溪上翁飲瓢亦自足溪
南刈薪草溪北修牆屋歲種一頃田春驅兩黃犢於中
甚安適此外無營欲溪畔偶相逢庵中遂同宿辭翁向
朝市問我何官祿虛言笑殺翁郎官應列宿

重過壽泉憶與楊九別時因題店壁

商州南十里有水名壽泉湧出石崖下流經山店前憶
昔相送日我去君言還寒波與老淚此地共潺湲一去
歷萬里再來經六年形容已變改處所猶依然他日君

過此殷勤吟此篇

西掖早秋直夜書意

自此後中書舍人時作

涼風起禁掖
新月生宮沼
夜半秋暗來
萬年枝嫋嫋
炎涼遞時節
鐘鼓交昏曉
遇聖惜年衰
報恩愁力小
素餐無補益
朱紱虛纏繞
冠蓋栖野雲
稻粱養山鳥
量能私自省
所得已非少
五品不為賤
五十不為夭
若無知足心
貪求何日了

庭松

堂下何所有十松當我階亂立無行次高下亦不齊高

者三丈長下者十尺低有如野生物不知何人栽接以

青瓦屋承之白沙臺朝昏有風月燥濕一作無塵泥疎

韻秋槭槭一作涼陰夏淒淒春深微雨夕滿葉珠蓑蓑

一作歲暮大雪天壓枝玉皚皚四時各有趣萬木非其

儕去年買此宅多為人所咤一家二十口移轉就松來

移來一作有何得但得煩襟開即此是益友豈必交賢

才顧我猶俗士冠帶走塵埃未稱為松主時時一媿懷

竹窻

常愛輞川寺竹窻東北廊一別十餘載見竹未曾忘今
春二月初卜居在新昌未暇作廐庫且先營一堂開窻
不糊紙種竹不依行意取北簷下窻與竹相當遠屋聲
淅淅逼人色蒼蒼煙通香靄氣月透玲瓏光是時三伏
天天氣熱如湯獨此竹窻下朝迴解衣裳輕紗一幅巾
小簟六尺牀無客盡日靜有風終夜涼乃知前古人言
事頗諳詳清風北窻卧可以傲羲皇

同韓侍郎遊鄭家池吟詩小飲

野艇容三人晚池流浼浼悠然依棹坐水思如江海宿
雨洗沙塵晴風蕩煙靄殘陽上竹樹枝葉生光彩我本
偶然來景物如相待白鷗驚不起綠荻行堪採齒髮雖
已衰性靈未云改逢詩遇杯酒尚有心情在

晚歸有感

朝弔李家孤暮問崔家疾

時李十一侍郎諸子尚居憂
崔二十二員外三年卧病

回馬獨歸來低首心鬱鬱平生所善者多不過六七如

何十年間零落三無一劉曾夢中見元向花前失

劉三十二

校書致後嘗夢見之元八少尹今春櫻桃花時長逝漸老與誰遊春城好風日

曲江感秋二首

并序

元和二年三年四年予每歲有曲江感秋詩凡三篇

編在第七集卷

按今本第七卷乃江州詩而所謂第七集者已莫可考可見編次之太非

其舊矣是時予為左拾遺翰林學士無何貶江州司馬

忠州刺史前年遷主客郎中知制誥未周歲授中書

舍人今遊曲江又值秋日風物不改人事屢變況予

中否後遇昔壯今衰慨然感懷復有此作噫人生多
故不知明年秋又何許也時二年七月十日云耳

元和二年秋我年三十七長慶二年秋我年五十一中
間十四年六年居譴黜窮通與榮悴委運隨外物遂師
廬山遠重弔湘江屈夜聽竹枝愁秋看豔堆沒近辭巴
郡印又秉綸闈筆晚遇何足言白髮映朱紱消沉昔意
氣改換舊容質獨有曲江秋風煙如往日

疎蕪南岸草蕭颯西風樹秋到未

一作來

幾時蟬聲又無

數沙平綠茸合蓮落青房露今日臨望時往年感秋處
池中水依舊城上山如故獨我鬢間毛昔黑今垂素
名與壯齒相避如朝暮時命始欲來年顏已先去當春
不歡樂臨老徒驚悞故作詠懷詩題於曲江路

翫松竹二首

龍蛇隱大澤麋鹿遊豐艸栖鳳安於梧潛魚樂於藻吾
亦愛吾廬廬中樂吾道前松後修竹偃卧可終老各附
其所安不知他物好

坐愛前簷前卧愛北窻北窻竹多好風簷松有嘉色幽
懷一以合俗念隨緣息在爾雖無情於予即有得乃知
性相近不必動與植

衰病無趣因吟所懷

朝飧多不飽夜卧常少睡自覺寢食間都無少年味平
生好詩酒今亦將捨棄酒唯下藥飲無復曾歡醉詩多
聽人吟自不題一字病姿與一作引衰相日夜相繼至况
當尚少朝彌慙居近侍終當求一郡聚少漁樵費合口

便歸山不問人間事

逍遙詠

亦莫戀此身亦莫厭此身此身何足戀萬劫煩惱根此
身何足厭一聚虛空塵無戀亦無厭始是逍遙人



白香山詩集卷十一

欽定四庫全書

集部

白香山詩集卷十三

詳校官監察御史_臣查瑩

檢討_臣何思鈞覆勘

覆校官中書_臣康儀鈞

校對官中書_臣吳裕德

謄錄監生_臣沈希曾

欽定四庫全書

白香山詩集卷十二

歙縣汪立名編

長慶集卷二

感傷歌行

曲引雜
八首

短歌行

瞳瞳太陽如太色上行千里下一刻出為白晝入為夜

圓轉如珠住不得住不得可奈何為君舉酒歌短歌歌

聲苦詞亦苦四座少年聽聽取今夕未竟明旦一作夕催

秋風纔住春風迴人無根帶時不駐朱顏白日相隨頽

勸君且强笑一面勸君復强飲一杯人生不得長歡樂
年少須臾老到來

生離別

食鹽不易食梅難鹽能苦兮梅能酸未如生別之為難
苦在心兮酸在肝晨雞再鳴殘月沒征馬連嘶一作嘶風行

人出回看骨肉哭一聲梅酸鹽苦甘如蜜黃河水白黃

雲秋行人河邊相對愁天寒野

一作路

曠何處宿棠梨葉

戰風颭颭生離別生離別憂從中來無斷絕憂極

一作積

心勞血氣衰末年三十生白髮

浩歌行

天長地久無終畢昨夜今朝又明日鬢髮蒼浪牙齒疎
不覺身年四十七前去五十有幾年把鏡照面心茫然
既無長繩繫白日又無大藥駐朱顏朱顏日漸不如故
青史功名在何處欲留年少待富貴富貴不來年少去
去復去兮如長河東流赴海無迴波賢愚貴賤同歸盡
北邙冢墓高嵯峨古來如此非獨我未死有酒且高歌

顏回短命伯夷餓我今所得亦已多功名富貴須待

一作

推命命若

一作苟

不來爭奈何

王夫子

王夫子送君為一尉東南三千五百里道途雖遠位雖卑月俸猶堪活妻子男兒口讀古人書束帶斂手來從事近將狗祿給一家遠則行道佐時理行道佐時須待命委身下位無為恥命苟未來且求食官無卑高及遠邇男兒上既未能濟天下下又不至饑寒死吾觀九品

至一品其間氣味都相似紫綬朱紱青布衫顏色不同
而已矣王夫子別有一事欲勸君逢一作過酒逢春且歡

喜

江南遇天寶樂叟

白頭老

一作病

叟泣且言祿山未亂入梨園能彈琵琶和

法曲多在華清隨至尊是時天下太平久年年十月坐
朝元千官起居環珮合萬國會同車馬奔金鈿照耀石
甕寺蘭麝熏煮溫湯源貴妃宛轉侍君側體弱不勝珠

翠繁冬雪飄。錦袍暖春風。蕩漾霓裳翻。歡娛未足燕。
冠至弓勁馬肥。胡語諠幽土。人遷避夷狄。鼎湖龍去哭。
軒轅從此漂。淪落南土萬人死。盡一身存秋風江上浪。
無限暮雨舟中酒。一樽涸魚久失風。波勢枯草曾沾雨。
露恩我自秦來君莫問。驪山渭水如荒村。新豐樹老籠
明月。長生殿閤鎖春雲。一作黃昏紅葉紛紛葢歌瓦。綠苔重
重封壞垣。唯有中官作宮使。每年寒食一開門。

送張山人歸嵩陽

黃雲慘慘天微雪，循行坊西鼓聲絕。
張生馬瘦衣且單，夜扣柴門與我別。
魏君冒寒來別我，為君沽酒張燈火。
酒酣火煖與君言，何事出關又入關。

一作君何入關又出關

答云

前年偶下山，四十餘月客長安。
長安古來名利地，空手無金行路難。
朝遊九城陌，肥馬輕車欺殺客。
暮宿五侯門，殘茶冷酒愁殺人。
春明門外城一作高，高處直下一作門前。
便是高山路，幸有雲泉容此身。
明日辭君且歸去。

醉後走筆酬劉五主簿長句之贈兼簡張大賈

二十四先輩昆季

劉兄文高行孤立十五年前名翕習是時相遇在符離
我年二十君三十得意忘年心迹親寓居同縣日知聞
衡門寂寞朝尋我古寺蕭條暮訪君朝來暮去多攜手
窮巷貧居何所有秋燈夜寫聯句詩春雪朝傾煖寒酒
俾湖綠愛白鷗飛灘水清憐紅鯉肥偶語閒攀芳樹立
相扶醉蹋落花歸張賈弟兄同里巷乘閒數數來相訪
雨天連宿草堂中月夜徐行石橋上我年漸長忽自驚

鏡中冉冉髭鬚生，心畏後時同勵志。
身牽前事各求名，問我栖栖何所適。
鄉人薦為鹿鳴客，二千里別謝交遊。
三十韻詩慰行役，出門可憐唯一身。
敝裘瘦馬入咸秦，蓼蓼街鼓紅塵闇。
晚到長安無主人，二賈二張與余弟。
驅車遽迤來相繼，操詞握賦為干戈。
鋒銳森然勝氣多，齊入文場同苦戰。
五人十載九登科，二張得雋名居甲。
美退爭雄重告捷，棠棣輝榮並桂枝。
芝蘭芬馥和荆葉，唯有沅屏屈未伸。
握中自謂駭雞珍，三年不鳴鳴必大。

豈獨駭雞當駭人元和運啟千年聖同遇明時余最幸
始辭秘閣吏王畿遽列諫垣升禁闈蹇步何堪鳴珮玉
衰容不稱著朝衣閭闔晨開朝百辟冕旒不動香煙碧
步登龍尾上虛空立去天顏無咫尺宮花似雪從乘輿
禁月如霜坐直廬身賤每驚隨內宴才微常媿草天書
晚松寒竹新昌第職居密近門多閉日暮銀臺下直回
故人到門門暫開回頭下馬一相顧塵土滿衣何處來
斂手炎涼敘未畢先說舊山今悔出岐陽旅宦少歡娛

江左羈遊費時日贈我一篇行路吟吟之句句披沙金
歲月徒催白髮貌泥塗不屈青雲心誰會茫茫天地意
短才獲用長才棄我隨鷓鴣鷺入煙雲謬上丹墀為近臣
君同鸞鳳棲荆棘猶著青袍作選人惆悵知賢不能薦
徒為出入蓬萊殿月慙諫紙二百張歲媿俸錢三十萬
大抵浮榮何足道幾度相逢即身老且傾斗酒慰羈愁
重話符離問舊遊北巷鄰居幾家去東林舊院何人住
武里邨花落復開流溝山色應如故感此酬君千字詩

醉中分手又何之須知通塞尋常事莫歎浮沉先後時
慷慨臨岐重相勉殷勤別後加飧飯君不見買臣衣錦
還故鄉五十身榮未為晚

和錢員外答盧員外早春獨遊曲江見寄長句
春來有色闇融融先到詩情酒思中柳岸霏微裊塵雨
杏園淡蕩開花風聞君獨遊心鬱鬱薄晚新晴騎馬出
醉思詩侶有同年春歎翰林無暇日雲夫首倡寒玉音
蔚章繼和春搜吟此時我亦閉門坐一日風光三處心

雲夫尉章同年及第時
予與尉章同在翰林

東墟晚歇

時退居
渭村

涼風冷露蕭索天黃蒿紫菊荒涼田遶冢秋花少顏色
細蟲小蝶飛翻翻中有騰騰獨行者手拄漁竿不騎馬
晚從南澗釣魚回歇此墟中白楊下褐衣半故白髮新
人逢知我是何人誰言渭浦棲遲客曾作甘泉侍從臣

客中月

客從江南來時月上弦悠悠行旅中三見清光圓曉

隨殘月行夕與新月宿誰謂月無情千里遠相逐朝發
渭水橋暮入長安陌不知今夜月又作誰家客

挽歌詞

丹旄何飛揚素驂亦悲鳴晨光照閭巷轎車儼欲行蕭
條九月天晚出洛陽城

一作哀挽
出重城

借問送者誰妻子與

弟兄蒼蒼古原上峨峨開新塋含酸一慟哭異口同哀

聲舊壠轉蕪絕新墳日羅列春風秋草

一作
草綠

北邙山此

地年年生死別

長相思

九月西風興月冷露華凝思君秋夜長一夜魂九升二
月東風來草拆花心開思君春日遲一日腸九迴妾住
洛橋北君住洛橋南十五即相識今年二十三有如女
蘿草生在松之側蔓短枝苦高縈迴上不得人言人有
願願至天必成願作遠方獸步步比肩行願作深山木
枝枝連理生

山鷓鴣

山鷓鴣朝朝暮暮啼復啼時露白風淒淒黃茅崗頭
秋日晚苦竹嶺下寒月低畬田有粟何不啄石楠有枝
何不棲迢迢不緩復不急樓上舟中聲聞入夢鄉遷客
展轉卧抱兒寡婦彷徨立山鷓鴣爾本此鄉鳥生不辭
巢不別羣何苦聲聲啼到曉啼到曉唯能愁北人南人
慣聞如不聞

放旅鴈

元和十
年冬作

九江十年冬大雪江水生冰樹枝折百鳥無食東西飛

中有旅鴈聲最飢雪中啄草冰上宿翅冷騰空飛動遲
江董持網捕將去手攜入市生賣之我本北人今謫謫
人鳥雖殊同是客見此客鳥傷客人贖汝放汝飛入雲
鴈鴈汝飛向何處第一莫飛西北去淮西有賊討未平
百萬甲兵久屯聚官軍賊軍相守老食盡兵窮將及汝
健兒飢餓射汝喫拔汝翅翎為箭羽

送春歸

元和十一年三月三十日作

送春歸三月盡日日暮時去年杏園花飛御溝綠何處

送春曲江曲今年杜鵑花落子規啼送春何處西江西
帝城送春猶怏怏天涯送春能不加惆悵莫惆悵送春
人冗員無替五年罷應須準擬再送潯陽春五年炎涼
凡十變又知此身健不健好送今年江上春明年未死
還相見

山石榴寄元九

山石榴一名山躑躅一名杜鵑花杜鵑啼時花撲撲九
江三月杜鵑來一聲催得一枝開江城上佐閒無事山

下斲得廳前栽爛熳一欄十八樹根株有數花無數千
房萬葉一時新嫩紫殷紅鮮麴塵淚痕衰損胭脂臉剪
刀裁破紅綃巾謫仙初墮愁在世姍女新嫁嬌泥去聲春
日射血珠將滴地風翻火燄欲燒人間折兩枝持在手
細看不似人間有花中此物是西施芙蓉芍藥皆嫫母
奇芳絕豔別者誰通州遷客元拾遺拾遺初貶江陵去
去時正值青春暮商山秦嶺愁殺人山石榴花紅夾路
題詩報我何所云苦云色似石榴裙當時叢畔唯思我

今日欄前只憶君
憶君不見坐銷落
日西風起紅紛紛

畫竹歌

并引

協律郎蕭悅善畫竹舉時無倫蕭亦甚自秘重有終
歲求其一竿一枝而不得者知予天與好事忽寫一
十五竿惠然見投予厚其意高其藝無以答貺作歌
以報之凡一百八十六字云

植物之中竹難寫
古今雖畫無似者
蕭郎下筆獨逼真
丹青以來唯一人
人畫竹身肥擁腫
蕭畫莖瘦節節竦

人畫竹稍死羸垂蕭畫枝活葉葉動不根而生從意生
不笋而成由筆成野塘水邊碕岸側森森兩叢十五莖
嬋娟不失筠粉態蕭颯盡得風煙情舉頭忽看不似畫
低耳靜聽疑有聲西叢七莖勁而健省向天竺寺前石
上見東叢八莖疎且寒憶曾湘妃廟裏雨中看幽姿遠
思少人別與君相顧空長歎蕭郎蕭郎老可惜手顫一
戰眼昏頭雪色自言便是絕筆時從今此竹尤難得

真孃墓

墓在虎
邱寺

真孃墓虎邱道不識真孃鏡中面唯見真孃墓頭草霜
摧桃李風折蓮真孃死時猶少年脂膚美手不牢固世
間尤物難留連難留連易銷歇塞北花江南雪

長恨歌

長恨歌傳開元中泰階平四海無事玄宗在
位歲久倦于旰食宵衣政無小大始委于右
丞相深居遊宴以聲色自娛先是元獻皇后
武淑妃皆有寵相次即世宮中雖良家子千
數無可悅目者上心忽忽不樂時每歲十月
駕幸華清宮內外命婦媚耀景從浴日餘波
賜以湯沐春風靈液淡蕩其間上心油然而
有顧遇左右前後粉色如玉詔高力士潛搜

外宮得弘農楊玄琰女于壽邸既笄矣鬢髮
膩理纖穠中度舉止閑治如漢武帝李夫人
別疏湯泉詔賜澡瑩既出水體弱力微若不
任羅綺光彩煥發轉動照人上甚悅進見之
日奏霓裳羽衣曲以導之定情之夕授金釵
鈿合以固之又命戴步搖垂金璫明年冊為
貴妃半后服用繇是治其容敏其詞婉嬾萬
態以中上意上益嬖焉時省風九州泥金五
岳驪山雪夜上陽春朝與上行同室宴專席
寢專房雖有三夫人九嬪二十七世婦八十
一御妻暨後宮才人樂府妓女使天子無顧
盼意自是六宮無復進幸者非徒殊豔尤態
致是益才智明慧善巧便佞先意希旨有不
可形容者叔父昆弟皆列在清貫爵為通侯
姊妹封國夫人富埒王室車服邸第與大長
公主侔而恩澤勢力則又過之出入禁門不

問京師長吏為側目故當時謠誅有云生女
勿悲酸生男勿喜歡又曰男不封侯女作妃
看女却為門上楣其人心羨慕如此天寶末
凡國忠盜丞相位愚弄國柄及安祿山引兵
向闕以討楊氏為辭潼關不守翠華南幸出
咸陽道次馬嵬亭六軍徘徊持戟不進從官
郎吏伏上馬前請誅以謝天下國忠奉覲纓
盤水死於道周左右之意未快上問之當時
敢言者請以貴妃塞天下怒上知不免而不
忍見其死反袂掩面使牽之而去蒼黃展轉
竟就絕於尺組之下既而玄宗狩成都肅宗
受禪靈武明年大光歸元大駕還都尊玄宗
為太上皇就養南宮遷于西內時移事去樂
盡悲來每至春之日冬之夜池蓮夏開宮槐
秋落梨園弟子玉琯發音聞霓裳羽衣一聲
則天顏不怡左右獻款三載一意其念不衰

求之夢魂香不能得適有道士自蜀來知上
皇心念楊妃如是自言有李少君之術玄宗
大喜命致其神方士乃竭其術以索之不至
又能遊神馭氣出天界沒地府以求之不見
又旁求四虛上下東極大海跨蓬壺見最高
仙山上多樓閣西廂下有洞戶東向闔其門
署曰玉妃太真院方士抽簪扣扉有雙童女
出應門方士造次未及言而雙鬟復入俄有
碧衣侍女又至詰其所從方士因稱唐天子
使者且致其命碧衣云玉妃方寢請少待之
于時雲海沉沉洞天日晚瓊戶重闔悄然無
聲方士屏息斂足拱手門下久之而碧衣延
入且曰玉妃出見一人冠金蓮披紫綃珮紅
玉曳鳳鳥左右侍者七八人揖方士問皇帝
安否次問天寶十四年已還事言訖惘然指
碧衣取金釵細合各折其半授使者曰為謝

太上皇謹獻是物尋舊好也方士受辭與信
將行色有不足玉妃固徵其意復前跪致詞
請當時一事不為他人聞者驗於太上皇不
然恐鈿合金釵負新垣平之詐也玉妃莊然
退立若有所思徐而言之曰昔天寶十載侍
輦避暑驪山宮秋七月牽牛織女相見之夕
秦人風俗是夜張錦繡陳飲食樹瓜果焚香
于庭號為乞巧宮掖間尤尚之夜殆半休侍
衛於東西廂獨侍上上凭肩而立因仰天感
牛女事密相誓心願世世為夫婦言畢執手
各嗚咽此獨君王知之耳因自悲曰由此一
念又不得居此復墮下界且結後緣或為天
或為人決再相見好合如舊因言太上皇亦
不久人間幸唯自安無自苦耳使者還奏太
上皇皇心震悼日日不豫其年夏四月南宮
晏駕元和元年冬十二月太原白樂天自校

書郎尉于盤屋鴻與琅邪王質夫家于是邑
暇日相攜遊仙遊寺語及此事相與感歎質
夫舉酒于樂天前曰夫希代之事非遇出世
之才潤色之則與時消沒不聞于世樂天深
於詩多於情者也試為歌之如何樂天因為
長恨歌意者不但感其事亦欲徵尤物室亂
階垂于將來也歌既成使鴻傳焉世所不聞
者予非開元遺民不得知世所知者有玄宗
本紀在今但傳長恨歌
云爾前進士陳鴻撰

漢皇重色思傾國御宇多年求不得楊家有女初長成
養在深閨人未識天生麗質難自棄一朝選在君王側
迴眸一笑百媚生六宮粉黛無顏色春寒賜浴華清池

溫泉水滑洗凝脂。侍兒扶起嬌無力。始是新承恩澤時。

雲鬢花顏

一作冠

金步搖。芙蓉帳暖度春宵。

一作帳裏暖春宵

春

宵苦短日高起。從此君王不早朝。承歡侍宴

一作寢

無閒

暇。春從春遊夜專夜。

一作漢

宮佳麗三千人。三千寵愛

在一身。金屋妝成嬌侍夜。玉樓宴罷醉和春。姊妹弟兄

皆列土。可憐光彩生門戶。遂令天下父母心。不重生男

重生女。驪宮高處入青雲。仙樂風飄處處聞。緩歌慢舞

凝絲竹。盡日君王看

一作聽

不足。漁陽鞞鼓動地來。驚破

霓裳羽衣曲九重城闕煙塵生千乘萬騎西南行翠華
搖搖行復止西出都門百餘里六軍不發無奈何宛轉
蛾眉馬前死花鈿委地無人收翠翹金雀玉搔頭君王
掩面救不得回看血淚相和流黃埃散漫風蕭索雲棧
縈紆登劒閣峨嵋山下少人行旌旗無光日色薄蜀江
水碧蜀山青聖主朝朝暮暮情行宮見月傷心色夜雨
聞鈴腸斷聲天旋日轉迴龍馭到此躊躇不能去馬嵬
坡下泥一作塵土中不見玉顏空死處君臣相顧盡沾衣

東望都門信馬歸歸來池苑皆依舊太液芙蓉未央柳
芙蓉如面柳如眉對此如何不淚垂春風桃李花開日

一作夜秋雨梧桐葉落時西宮南內多秋草落葉滿階紅

不掃梨園弟子白髮新椒房阿監青娥老夕殿螢飛思
悄然孤一作秋燈挑盡未成眠遲遲鐘鼓初長夜耿耿星

河欲曙天鴛鴦瓦冷霜華重翡翠衾寒誰與共一作舊枕故衾

共悠悠生死別經年魂魄不曾來入夢臨邛道士鴻

都客能以精誠致魂魄為感君王展轉思一作思遂教方

士殷勤覓排雲馭氣奔如電升天入地求之遍上窮碧
落下黃泉兩處茫茫皆不見忽聞海上有仙山山在虛
無縹緲間樓閣

一作殿

玲瓏五雲起其中綽約多仙子中

有一人字太真

一作字玉真
又名玉妃

雪膚花貌參差是金闕西

廂叩玉扃轉教小玉報雙成聞道漢家天子使九華帳
裏夢魂驚攬衣推枕起徘徊珠箔銀鉤迤邐開雲鬢半
偏新睡覺花冠不整下堂來風吹仙袂飄飄舉猶似霓
裳羽衣舞玉容寂寞淚闌干梨花一枝春帶雨含情凝

涕

一作睇

謝君王一別音容兩渺茫
昭陽殿裏恩愛絕
蓬

萊宮中日月長
回頭下望人寰處
不見長安見塵霧
唯

將

一作空持

舊物表深情
鈿合金釵寄將去
釵留一股合一

扇
釵擘黃金合
分鈿但教心似金
鈿堅天上人間會相
見
臨別殷勤重寄詞
詞中有誓兩心知
七月七日長生
殿夜半無人私語時
在天願作比翼鳥
在地願為連理
枝
天長地久有時盡
此恨綿綿無盡期

隱居詩話云唐人詠馬嵬事多矣世所稱白居易六軍不發無奈何宛轉蛾眉馬前死此乃歌詠祿山能

使官軍叛逼追明皇不得已而誅楊妃也豈特不曉
文章體裁而造語蠢拙抑亦失臣下事君之禮老杜
則不然其北征詩曰不聞夏殷衰中自誅褒姒乃見
明皇鑒夏商之敗畏天悔禍賜妃子以死官軍何與
焉立名按此論為推尊少陵則可若以此貶樂天則
不可論詩須相題為長恨歌本與陳鴻王質夫話楊妃
始終而作猶慮詩有未詳陳鴻又作長恨歌傳所謂
不特感其事亦欲懲尤物室亂階垂于將來也自與
北征詩不同若諱馬嵬事實則長恨二字便無著落
矣讀書全不理會作詩本末而執片詞肆議古人已
屬大過至謂歌誅祿山能使官軍云云則尤近乎鍛
鍊矣宋人多文字吹求之禍皆釀于此等議論若唐
人作詩本無所謂忌諱忠厚之風自可慕也然陳傳
中敘貴妃進于壽邸而白詩諱之但云楊家有女初
長成養在深閨人未識天生麗質難自棄一朝選在
君王側安得謂樂天不知文章大體耶倘有祖其謬

以羅織少陵者必將以少陵憶昔詩張后不樂天子
忙句為失以臣事君之禮百官跣足隨天王句為歌
誅吐蕃追逼代
宗又豈通論乎

婦人苦

蟬鬢加意梳蛾眉用心掃幾度曉妝成君看不言好妾
身重同穴君意輕偕老惆悵去年來心知未能道今朝
一開口語少意何深願引他時事移君此日心人言夫
婦親義合如一身及至死生際何曾苦樂均婦人一喪
夫終身守孤子有如林中竹忽被風吹折一折不重生

枯死猶抱節男兒若喪婦能不暫傷情應似門前柳逢
春易發榮風吹一枝折還有一枝生為君委曲言願君
再三聽須知婦人苦從此莫相輕

長安道

花枝缺處青樓開豔歌一曲酒一盃美人勸我急行樂
自古朱顏不再來君不見外州官客長安道一迴來時
一迴老

立名按文苑英華末二句作外州客長
安道一迴來一迴老去二字亦甚佳

潛別離

不得哭潛別離不得語暗相思兩心之外無人知深籠
夜鑠獨棲鳥利劍春斷連理枝河水雖濁有清日烏頭
雖黑有白時唯有潛離與暗別彼此甘心無後期

隅浦蓮

隅浦愛紅蓮昨日看猶在夜來風吹落只得一回採花
開雖有明年期復愁明年還暫時

寒食野望吟

邱墟郭門外寒食誰家哭風吹曠野紙錢飛古墓累累
春草綠棠梨花映白楊樹盡是死生離別處冥漠重泉
哭不聞蕭蕭暮雨人歸去

琵琶引

并序

元和十年予左遷九江郡司馬明年秋送客湓浦口

聞舟中夜彈琵琶者聽其音錚錚然有京都一作聲

問其人本長安倡女嘗學琵琶於穆曹二善才年長
色衰委身為賈人婦遂命酒使快彈數曲曲罷憫默

自敘少小時歡樂事今漂淪憔悴轉徙於江湖間予
出官二年恬然自安感斯人言是夕始覺有遷謫意
因為長句歌以贈之凡六百一十二言命曰琵琶行
潯陽江頭夜送客楓葉荻花秋瑟瑟主人下馬客在船
舉酒欲飲無管絃醉不成歡慘將別別時茫茫江浸月
忽聞水上琵琶聲主人忘歸客不發尋聲暗問彈者誰
琵琶聲停欲語遲移船相近邀相見添酒回燈重開宴
千呼萬喚始出來猶抱一作琵琶半遮面轉軸撥絃三

兩聲未成曲調先有情絃絃掩抑聲聲思似訴平生不

得志

一作意

低眉信手續續彈說盡心中無限事輕攏慢

撚抹復挑初為霓裳後六么

一作綠腰

大絃嘈嘈如急雨小

絃切切如私語嘈嘈切切錯雜彈大珠小珠落玉盤間

關鶯語花底滑幽咽泉流水

一作冰

下灘

一作難

水泉冷澀

絃疑絕疑絕不通聲暫歇別有幽情暗恨生此時無聲

勝有聲銀瓶乍破水漿迸鐵騎突出刀槍鳴曲終收撥

當心畫四絃一聲如裂帛東船西舫悄無言唯見江心

秋月白沉吟放撥插絃中整頓衣裳起歛容自言本是
京城女家在蝦蟇陵下住十三學得琵琶成名屬教坊
第一部曲罷曾教善才伏妝成每被秋娘妬五陵年少
爭纏頭一曲紅綃不知數鈿頭雲篦擊節碎血色羅裙
翻酒污今年歡笑復明年秋月春風等閒度弟走從軍
阿娘死暮去朝來顏色故門前冷落鞍馬稀老大嫁作
商人婦商人重利輕別離前年浮梁買茶去去來江口
守空船遶船月明江水寒夜深忽夢少年事夢啼妝淚

紅闌干

一作啼妝淚
落紅闌干

我聞琵琶已歎息又聞此語重唧

唧同是天涯淪落人相逢何必曾相識我從去年辭

一作

帝京謫居卧病潯陽城潯陽地僻

一作小處

無音樂終歲

不聞絲竹聲住近湓江地低濕黃蘆苦竹遶宅生其間

旦暮聞何物杜鵑啼血猿哀鳴春江花朝秋月夜往往

取酒還獨傾豈無山歌與村笛嘔啞嘲嚕難為聽今夜

聞君琵琶語如聽仙樂耳暫明莫辭更坐彈一曲為君

翻作琵琶行感我此言良久立却坐促絃絃轉急淒淒

不似向前聲滿座重聞皆掩泣座

一作就

中泣下

一作淚

誰

最多江州司馬青衫濕

立名按容齋五筆白公琵琶行讀者但羨其風致敬其詞章至形於樂府詠歌之不足遂以謂真為長安故倡而作不知直欲據寫天涯淪落之恨爾東坡謫黃州賦定惠院海棠詩有陋邦何處得此花無乃好事移西蜀天涯流落俱可念為飲一尊歌此曲其意亦爾也

簡簡吟

蘇家小女名簡簡芙蓉花腮柳葉眼十一把鏡學點妝
十二抽針能繡裳十三行坐事調品不肯迷頭白地藏

玲瓏雲髻生菜樣飄飄風袖薔薇香殊姿異態不可狀
忽忽轉動如有光二月繁霜殺桃李明年欲嫁今年死
丈人阿母忽悲啼此女不是凡夫妻恐是天仙謫人世
只合人間十三歲大都好物不堅牢彩雲易散琉璃脆
花非花

花非花霧非霧夜半來天明去來如春夢幾多時去似
朝雲無覓處

醉後狂言酬贈蕭殷二協律

餘杭邑客多羈貧其間甚者蕭與殷天寒身上猶衣葛
日高甌中未拂塵江城山寺十一月北風吹沙雪紛紛
賓客不見絺袍惠黎庶未沾襦袴恩此時太守自慚媿
重衣複衾有餘溫因命染人與針女先製兩裘贈二君
吳綿細軟桂布密柔如狐腋白似雲勞將詩書投贈我
如此小惠何足論我有大裘君未見寬廣和暖如陽春
此裘非繒亦非纊裁以法度絮以仁刀尺鈍拙製未畢
出亦不獨裹一身若令在郡得五考與君展覆杭州人

立名按今本此下有贈商玲瓏醉歌一首乃長慶三年詩正入後集說見本詩下又自十三卷至二十卷今本皆作律詩而古調歌行雜體之誤收往往而有悉為摘出未敢以臆見穿鑿分列諷諭閑適感傷各卷但附雜體卷末仍各詳原次某卷以存其舊

夜哭李夷道

以下十三卷內並未應舉時作

逝者絕影響空庭朝復昏
家人哀臨畢夜鏤壽堂門
無妻無子何人葬空見銘旌向月翻

病中作

時年十八

久為勞生事不學攝生道
年少已多病此身豈堪老

立名按容齋隨筆今人富貴中作不如意語少壯時作衰病語詩家往往以為識白公十八歲病中作如此而壽至七十五則詩識之說不盡然也

秋江晚泊

扁舟泊雲島倚棹念鄉國四望不見人煙江澹秋色客心貧易動日入愁未息

寒食卧病

病逢佳節長歎息春雨濛濛榆柳色羸坐全非舊日容扶行半是他人力諠諠里巷蹋青歸笑閉柴門度寒日

寒食月夜

風香露重梨花濕草舍無煙

一作燈

愁未入南鄰北

一作井

里歌吹時獨倚柴門月中立

長安早春旅懷

軒車歌吹諠都邑中有一人向隅立夜深明月卷簾愁
日暮青山望鄉泣風吹新綠草芽拆雨灑輕黃柳條濕
此生知負少年春不展愁眉欲三十

晚秋夜

以下十四卷內

碧空溶溶月華靜月裏愁人弔孤影花開殘菊傍疎籬
葉下哀桐落寒井塞鴻飛急覺秋盡鄰雞鳴遲知夜永
凝情不語空所思風吹白露衣裳冷

和錢員外早冬翫禁中新菊

禁署寒氣遲孟冬菊初拆新黃間繁綠爛若金照碧仙
郎小隱日心似陶彭澤秋憐潭上看日慣籬邊摘今來
此地賞野意潛自適金馬門內花玉山峰下客寒芳引
清句吟翫煙景夕賜酒色偏宜握蘭香不敵淒淒百卉

死歲晚冰霜積唯有此花開

一作有此花開時

殷勤助君惜

錢嘗

居藍田山

下故云

贈別宣上人

上人處世界清淨何所似似彼白蓮花在水不著水性
真悟泡幻行潔離塵滓修道來幾時身心俱到此嗟予
牽世網不得長依止離念與碧雲秋來朝夕起

和夢遊春詩一百韻

并序

微之既到江陵又以夢遊春詩七十韻寄予且題其

序曰斯言也不可使不知吾者知知吾者亦不可使
不知樂天知吾也吾不敢不使吾子知予辱斯言三
復其旨大抵悔既往而悟將來也然予以為苟不悔
不悟則已若悔於此則宜悟於彼也反於彼而悟於
妄則宜歸於真也況與足下外服儒風內宗梵行者
有日矣而今而後非覺路之返也非空門之歸也將
安反乎將安歸乎今所和者其章旨卒歸於此夫感
不甚則悔不熟感不至則悟不深故廣足下七十韻

為一百韻重為足下陳夢遊之中所以甚感者敘婚
仕之際所以至感者欲使曲盡其妄周知其非然後
返乎真歸乎實亦猶法華經序火宅偈化城維摩經
入娼舍過酒肆之義也微之微之予斯文也尤不可
使不知吾者知幸藏之云爾

昔君夢遊春夢遊仙山曲恍若有所遇似愜平生欲因
尋菖蒲水漸入桃花谷到一紅樓家愛之看不足池流
渡清泚草嫩踡綠蓐門柳闇全低簷櫻紅半熟轉行深

深院過盡重重屋烏龍卧不驚青鳥飛相逐漸聞玉珮
響始辨珠履躡遙見窻下人娉婷十五六霞光抱明月
蓮豔開初旭縹緲雲雨仙氣氤蘭麝馥風流薄梳洗時
世寬妝束袖軟異文綾裾輕單絲縠裙腰銀線壓梳掌
金篴蹙帶纈紫蒲萄袴花紅石竹凝情都未語付意微
相矚眉斂遠山青鬟低片雲綠帳牽翡翠帶被解鴛鴦
襖秀色似堪飡穠華如可掬半卷錦頭席斜鋪繡腰褥
朱唇素指勻粉汗紅綿撲心驚睡易覺夢斷魂難續籠

委獨棲禽劍分連理木存誠期有感誓志貞無黷京洛
八九春未曾花裏宿壯年徒自棄佳會應無復鸞歌不
重聞鳳兆從茲卜韋門女清貴裴氏甥賢淑羅扇夾花
燈金鞍攢繡轂既傾南國貌遂坦東床腹劉阮心漸忘
潘楊意方睦新修履信第初食尚書祿九醞備聖賢八
珍窮水陸秦家重蕭史彥輔憐衛叔朝饌饋獨盤夜醪
傾百斛親賓盛輝赫妓樂紛曄煜宿醉纔解醒朝歡俄
枕麴飲過君子爭今甚將軍酷酩酊歌鷓鴣顛狂舞鵲

鵲月流春夜短日下秋天速謝傳隙過駒

一作奔光

蕭娘風

送過

一作

燭全凋薜花折半死梧桐禿閨鏡對孤鸞哀絃

留寡鵠淒淒隔幽顯冉冉移寒燠萬事此時休百身何

處贖提携小兒女將領舊姻族再入朱門行一傍青樓

哭樾空無廐馬水涸失池鶯搖落廢井梧荒涼故籬菊

莓苔上几閣塵土生琴筑舞榭綴蠨蛸歌梁聚蝙蝠嫁

分紅粉妾賣散蒼頭僕門客思徬徨家人泣伊嚶心期

正蕭索宦序仍拘跼懷策入峭函驅車辭郊廓逢時念

既濟聚學思大畜端詳筮仕著磨拭穿楊鏃始從雙校
職首中賢良目一拔侍瑤墀再升紆繡服誓酬君王寵
願使朝廷肅密勿奏封章清明操憲牘鷹韝中病下劣
角當邪觸糾繆盡

一作靜

東周申寃動南蜀危言詆閹寺

直氣忤鈞軸不忍曲作鈞乍能折為玉捫心無媿畏騰
口有謗讟只要明是非何曾虞禍福車摧太行路劍落
鄴城獄襄漢問修途荆蠻指殊俗謫為江府掾遣事荆
州牧趨走謁麾幢喧煩視鞭朴簿書常自領縲囚每親

鞠竟日坐官曹經旬曠休沐宅荒渚宮草馬瘦畬田粟
薄俸等涓毫微官同桎梏月中照形影天際辭骨肉鶴
病翅羽垂獸窮爪牙縮行看鬢間白誰勸杯中綠時傷
大野麟命問長沙鵬夏梅山雨漬秋瘴海

一作江

雲毒巴

水白茫茫楚山青簇簇吟君七十韻是我心所蓄既去
誠莫追將來幸前勗欲除憂惱病當取禪經讀須悟事
皆空無令念將屬請思遊春夢此夢何閃倏豔色即空
花浮生乃焦穀良姻在嘉偶頃刻為單獨入仕欲榮身

須臾成黜辱合者離之始樂今憂所伏愁恨僧祇長歡
榮剎那促覺悟因傍喻迷執由當局膏明誘闇蛾陽焮
奔癡鹿貪為苦聚落愛是悲林麓水蕩無明波輪迴死
生輻塵應甘露灑垢待醍醐浴障要智燈燒魔須慧刀
戮外熏性易染內戰心難泐法句與心王期君日三復
微之常以法句及心王頭陀
經相示故申言以卒其志也

秋晚

十六卷內

籬菊花稀砌桐落樹陰離離日色薄單幕踈簾貧寂寞

涼風冷露秋蕭索
光陰流轉忽已晚
顏色凋殘不如昨
萊妻卧病月明時
不搗寒衣空搗藥

謫居

面瘦頭斑四十四
遠謫江州為郡吏
逢時棄置從不才
未老衰羸為何事
火燒寒澗松為燼
霜降春林花委地
遭時榮悴一時間
豈是昭昭上天意

偶然二首

楚懷邪亂靈均直
放棄合宜何惻惻
漢文明聖賈生賢

謫向長沙堪歎息人事多端何足怪天文至信猶差忒
月離于畢合霂霨有時不雨誰能測

火發城頭魚水裏救火竭池魚失水乖龍藏在牛領中
雷擊龍來牛枉死人道著神龜骨聖試卜魚牛那至此
六十四卦七十鑽畢竟不能知所以

喜山石榴花開

去年自廬山移來
以下十八卷內

忠州州裏今日花廬山山頭去年樹已憐根損斬新栽
還喜花開依舊數赤玉何人小琴軫紅纈誰家合羅袴

但知爛熳恣情開莫怕南賓桃李妒

惻惻吟

惻惻復惻惻逐臣返鄉國前事難重論少年不再得泥
塗絳老頭斑白炎瘴靈均面黎黑六年不死却歸來道
著姓名人不識

獨眠吟二首

夜長無睡起階前寥落星河欲曙天十五年來明月夜
何曾一夜不孤眠

獨眠客夜夜可憐長寂寂就中今夜最愁人涼月清風
滿床席

期不至

紅燭清尊久延佇出門入門天欲曙星稀月落竟不來
煙柳朧朧鵲飛去

代謝好答崔員外

謝好妓也
十九卷內

青娥小謝娘白髮老崔郎謾愛胸前雪其如頭上霜別
後曹家碑背上思量好字斷君腸

白香山詩集卷十二